



Павелнің римдегілерге пічиі

Пу паза Наа Молчаға кірген пічіктернің илеедезінің авторы Павел полча. Тіріл килген Христос Позы ағаа көрінгеннен сығара Павел, иудей ученайы, фарисей, Христос киртінізіне айлан парыбысхан.

Римдегі Христос тигірибі Павел ағаа пічік пасханнаң илееде алнынча төстелген. Ол пічиин пасчатхан туста Римде полғалах полған, че андағы тигірибнің хай-пірее араласчыларынаң таныс полған. Павел пічиин Римзер наа эраның 50 чылларында – Грецияда полғанында, неке, – Христос киртіністіг Фива тіп ипчінең ызыбысхан.

Пу пічіктің пастағы чардығының (1–11 пастағлар) өөн сағызы – Худай кізілерні чазыхтарының үчүн хатығладарынаң арачылапчатхан Чахсы Хабарның күзіненер. Кізі Иисус Христостанар Хабарға киртінчетсе, Худай аны ахтап, анынаң чаразып, аны пала идінче паза ағаа Позының Худын пирче. Христосха киртінгені ле ноо даа кізіні Худайның алнында ах-арығ итче.

Пічіктің ікінчі чардығында (12:1–15:13) Павел хығырығчыларға Христос киртіністіг кізілерге хайди чуртирға кирегін хатабох чоохтапча. Олар хынызып, үлгүнің холынаң сыхпин, улуғлазып чуртирға киректер. Түгенчізінде (15:14–16:27) Павел Римзер тұрчеден чидерге сағынчатханынаңар пасча паза Христос тигірибінің араласчыларына изенін читірче.

Алғыстығ алданыс

1 Мин, Христос Иисустың хулы Павел, Аның илчізі^с поларға хығыртылғам. Ол мині Худайның Чахсы Хабарын чарлирға таллаан. ²Ол Чахсы Хабарны Худай ухаанчылары^с пастыра Ызых Пічіктерінде молчаан. ³Ол Чахсы Хабар Худайның Оолғынаңар. Иді-ханы хоостыра Ол Давидтің^с төлінең сыххан кізі полған. ⁴Худай Худы^с хоостыра күстіг полып, өлімнең тіріліп, Ол Худайның Оолғы тіп чарлалған. Ол Чахсы Хабар Хан-пигібіс^с

Иисус Христостанар полча. ⁵Иисус Христос мағаа паарсазын читіріп, пісті илчі поларға турғысхан. Ол анзын прай чоннар, Аның чооғын истіп, Ағаа киртінерлері үчүн иткен. ⁶Сіер дее, Иисус Христостың хығыртхан кізілері, ол чоннарның санындазар.

⁷Сіерге прайларыңа Худайның Римде чуртапчатхан хынған кізілеріне, ах-арығ^с поларға хығыртылған чонына пасчам. Худай Пабабыстан паза Хан-пигібіс Иисус Христостан паарсас паза амыр хонх сіерге ползын. ⁸Иң пурнада Иисус Христостан пастыра прайзыңарның үчүн Худайымны алғыстапчам. Сіернің киртінізіңер тиксі-тилекейге чарлалча нооза. ⁹⁻¹⁰Худай Оолғынанар Чахсы Хабарны чарлап, прай көңнімні салып, Ағаа пазырчам. Худай мағаа киречі: мин Худайға пазырчатсам, сыбыра сіерні адапчам паза Худайның көңні хоостыра сіерерзер чидерімнеңер сурынчам. ¹¹Минің сіерні көрерім тың килче. Минің Худай Худының сыйыхтарынаң үлезерім килче: сіернің көңнілеріңні пик идерге, ¹²пасха чоохтаза, удур-төдір киртінізібіснен көңнілерібісті көдірізіп аларға.

¹³Харындастар, сіерні пілбин халбазыннар тіп сағынчам: мин сіерерзер көп хати килерге иткем, че амға теере харығ ниме табыл ла турған. Сіернің араларында даа, пасха чоннардағыох чіли, кізілерні Худайға айландырарға сағынчам. ¹⁴Мин прайзының алнында алымныңбын: гректернің дее, сас чонның даа, хыйғаларның даа, сағыс чоhtarның даа. ¹⁵Аннаңар, миннеңер чоохтаза, мин сіерге дее, римдегілерге, Чахсы Хабарны чарлирға тимдебін. ¹⁶Мин Христостанар Чахсы Хабарны чарлапчатханымнаң уятпинчам. Ол Хабарның киртінчеткеннерні хайзын даа, иң пурнада иудейні^с, анаң иудей ниместі арачылаң Худай күзі пар, нооза. ¹⁷Чахсы Хабар Худайның киртіністің үчүн кізіні ахтапчатханын көзітче. Иди пазылых: арығ чүректіг^с киртіністің сылтаанда чуртир.

Худайның алнында прайзы пыролығлар

¹⁸Худайны улуғлабинчатхан паза чабал итчеткен кізілерге тигірден Худайның өкпезі түзер. Олар чабал киректерінең сынны типсепчелер. ¹⁹Худайдаңар пілер ниме оларға азых полған. Худай Позы оларға анзын ас пирген нооза. ²⁰Тилекей пүткеннен ала Худайның итчеткен киректері, Аның мөгі күзі паза Позының илбегі харахха көрінмезелер дее, че Аның иткен нимелерінең пастыра көрінчелер. Кізілерге анзын, сизініп, оңарып аларға

ондай пар. Аннаңар олар ахтан полбастар. ²¹ Олар, Худайны піліп алған даа ползалар, Аны Худайны чіли саблабааннар, алғыс-табааннар. Аның орнына тик чоохтарға салынғаннар. Оларның алығ чүректерін харасхы пас парған. ²² Олар хыйғаларын көзіткеннер, сынында алығ полғаннар. ²³ Олар өлім пілбес сабланыстығ Худайға пазырбиныбысханнар. Аның орнына олар өлер кізілерні, аң-хустарны паза сойлаастарны сомнапчатхан омаларға пазырчалар. ²⁴ Оларның чүректерінің хычыхтаныстары тохтабааннар. Аннаңар Худай оларны постарының чазыхтарына^с артыс салған. Олар постарыох ит-ханнарын уйатха сухханнар. ²⁵ Олар Худайның сынын чойға орназыбысханнар. Чайаачының орнына чайалған нимее пазырғаннар. Чайаачы хақан даа алғастығ^с. Аминь^с.

²⁶ Аннаңар Худай оларны чиркестіг хынығыстарға пир салған: ипчілері чир-салылғанни ирлерінең хонмин, сан-тискер хыныс сыхханнар. ²⁷ Иреннер ідök, чир-салылғаны хоостыра ипчілерінең хонмин, удур-гөдір хынызып, хычаларын тохсындырғаннар. Иреннер иреннернең чиркестіг хынысханнарынаң пос постарын хатығлааннар. Ол алчаастарының үчүн түсчең хатығлас полған. ²⁸ Худайны пілерге сағыс тутпааннарынаңар, Худай оларны ардап парған сағыстарына пир салған – түүлістіг нимелер идерге. ²⁹ Олар сын нимес нимее, оралысха, көйтіктеніске, чаптанысха, чабалланысха, істі чохтанысха, өдіріске, тартысха, чойланысха, чабал хылысха, пат парғаннар. ³⁰ Олар чабал тілліглер, хопчылар, Худайны хырт көрчелер, кізі хыйыхтаачылар, көкеесімнер, махтанчыхтар, чабал нимее чапчаннар, паба-іченің чооғынаң сых парғаннар. ³¹ Олар сағыс чох, киртіске турыспас, тас чүректіг, айабас кізілер. ³² Иди тудынчатхан кізілер Худайның орта чарғызы чидерін пілчелер. Олар постарын өлімге турыстығларын пілзелер дее, постары даа ол ондайларын тастабинчалар, андағ кізілерні дее махтапчалар.

Худайның чарғызы прайзына пір

2 Ол ондайнаң син, пасхазын чарғылапчатхан ноо даа кізі, ахтан полбассың. Син пасхазын чарғылапчатхан чарғынаң позынны чарғылапчазың. Пасха кізіні чарғылап, позың, тізең, ідök итчезің. ² Че піс андағ киректерні итчеткен кізілерні Худай сыннаң хоостыра чарғылырын пілчебіс, нооза. ³ Алай син, кізі, андағ нимені итчеткен кізіні чарғылап, позың даа ідök итчедіп,

Худайның чарғызынаң озарға сағынчазың ма? ⁴Алай син, Худайның пай паарсазын, Аның пазымның, тыстаныстың полчатханын нимее салбинчазың ма? Худай паарсазының пастыра Позынзар айланарына чоллапчатханын онарбинчазың ма? ⁵Че өчес хылиин, аасхынмас чүреен үчүн, Худайның өкпезі чидер паза Аның орта чарғызы іле көзіділер күніне позың позына ол өкпені чыынып одырчазың.

⁶Худай полғанына ла иткен киректері хоостыра читіретер. ⁷Чахсы киректерінең сабланысты, аарласты, өлім пілбес чуртасты сыбыра тілепчеткен кізілерге Худай мөгі чуртас^c пирер. ⁸Постарын көдірчеткен паза сынның үлгүзіне кірбинчеткен, че постарын чойға салынчатхан кізілерге Худайның хазырланызы паза өкпезі чидер. ⁹Чабал ниме итчеткен ноо даа кізінің көнни, пурнада иудейни, анаң иудей нимес кізіни, чобағны көрер, істі тарланысха пастыра. ¹⁰Че чахсы ниме итчеткен ноо даа кізее, пурнада иудейге, анаң иудей нимес кізее, сабланыс, аарлас паза амыр хоних полар.

¹¹Худай чонны талластырбинча нооза. ¹²Чахың чох чуртапчатхан кізілер чазых итчетселер, олар, чахығның ондайынча чарғылатпин, ол парарлар. Че, чахығны пілчеткен кізілер чазых итчетселер, олар чахың хоостырох чарғыладарлар. ¹³Худай чахығны исчеткен кізілерні орта чоллығ кізілер тіп санабинча, че чахығны толдырчатхан кізілерні ахтапча. ¹⁴Пасха чоннарның чахығлары чоғыл, че чир-төрееннең чахығ хоостыра орта итчеткеннерінеңер, чахығлары чох таа полза, олар пос постарына чахығ полчалар. ¹⁵Олар чахығ ниме киректепчеткенін чүректерінең пілчеткенін көзітчелер. Аннаңар чүректері чоохтапча. Сағыстары оларны чахсы-чабалны талластыраға чоллапча: пірде пыролапча, пірде ахтапча. ¹⁶Ідөк Худай кізілернің чазыт киректерін Иисус Христостың пастыра чарғылир күнде полар. Анзынаңар мин чарлаан Чахсы Хабарда чоохталча.

¹⁷Мына син позыңны иудей тіп аданчазың, Чахыға ізенчезің паза Худайнаң махтанчазың. ¹⁸Син Аның көннин пілчезің, Чахыға төстеніп, ниме артых полчатханын оннапчазың. ¹⁹Син позыңны харах чохтарның чоллаачызы, харасхыда чөрчеткеннернің чарытхызы полчазың тіп санапчазың. ²⁰Син піліс чохтарға устағчы, час палаларға үгретчі полчазың. Чахығдаң пастыра синнің толдыра пілістің паза сынның көзідімі пар. ²¹Син, пасхаларын үгрөдіп, позыңны үгретпинчезің. ²²Оғырлабасха үгрөдіп,

позың оғырлапчазың. «Оралыспасха» тіп ала, поэң оралыс чөрчезің. Тайма худайлардаң чиркеніп, храмнарын тонапчазың. ²³ Чахығнаң махтанып, Чахығны сайбааныңнаң Худайның адын аарлабинчазың. ²⁴ Пазылых нооза: сірернің сылтаанда пасха чоннарда Худайның ады сөклетче.

²⁵ Сынап Чахығны толдырчатсаң на, сүннет^с иткені тузалығ полча. Чахығны сайбапчатсаң, тізең, синің сүннет иттіргенің иттіртпеенге килісче. ²⁶ Ол ондайнаң, сүннет иттірбеен кізі Чахығ хоостыра чуртапчатса, аның сүннет иттірбеені иттірткенге киліспес пе? ²⁷ Андада ол, төреені хоостыра сүннет иттіртпечең кізі, чахығны толдырчатса, сині, Чахығның сайбағчызың, төреені хоостыра сүннет иттірткен паза Худай Пічиі^с пар кізіні, пыролабас па? ²⁸ Тастындағы көрімінең не иудей кізі сын иудей нимес паза идінде сүннет иткені сын сүннет нимес. ²⁹ Істінең иудей полза, ол сын иудей. Сын сүннет кізінің идін кискені нимес, че чүректің алысханы. Андағ сүннет Чахығ хоостыра нимес, Худай Худының пастыра иділче. Андағ иудейлерге кізілердең нимес, че Худайдан махтас полар.

Худайның киртінізі

3 Андағда иудей полғанның нимезі артыхтыр паза сүннет иттірткеннің ноо тузазы? ² Прай даа саринаң көр килзе, көп нимезі артых. Иң пурнада – иудейлерге Худайның сөзі пиріл парғаны. ³ Оларның көбізі Худайға киртістіг полбаан. Оларның киртістіг полбааннары Худайның киртістіг полчатханын чох итче бе? ⁴ Чох, андағ нимес. Ноо даа кізі чой поладыр, Худай, тізең, киртістіг. Аннаңар піди пазыл парған: «Сөстерінде сын полчатханың көрінзін, Синің чарғында Син чинерзін».

⁵ Че пістің орта хылынмааныбыс Худайның орта итчеткенін іле сығарчатханда, анзы Худайның орта нимес өкпеленгенін таныхтапча ба? (Мин мыны кізі сағызынаң тіпчем.) ⁶ Чох, андағ нимес. Андағ полған полза, Худай тилекейіні хайди чарғылирчых? ⁷ Минің чойым пастыра Худайның сыны көптеліп, Ағаа сабланыс ағылчатханда, ноға мин чазыхтығ кізі чіли чарғылатчам? ⁸ Пірее кізілер, мині сөклек, миннеңер піди тіпчелер: «Ол, чыхсы нима полар үчүн, чабал нима идерге кирек тіп үгретче». Иди чоохтап чөрчеткен кізілернің чарғылатырғаннары орта полар.

Чазых чох кізі чоғыл

⁹ Ниме зе? Пасхаларының хыринда пістің, иудейлернің, артығыбыс пар ба? Пір дее чоғыл. Иудейлер дее, иудей ниместер дее – прайзы чазыхта чөрчеткеннерін піс сынынча көзіт пиргебіс. ¹⁰ Пазылых нооза: «Орта чоллығ пір дее кізі чоғыл». ¹¹ Сынны оңарчатхан пір дее кізі чоғыл, пірдеезі Худайны тілебинче. ¹² Прайзы чолдаң хыйыс парыбысханнар, тузалары чох кізілер пол парғаннар. Чахсы иткен пір кізі дее чоғыл. ¹³ Оларның аастары, азых хомдылар осхас, тіллері чой чоохты ла пілчелер. Оларның иріннерінде чылан оозы. ¹⁴ Ахсылары харғирға паза чабаллирға ла пілчелер. ¹⁵ Олар хан төгерге чапчаннар. ¹⁶ Оларның сооларында сайбағ паза чобағ хал парча. ¹⁷ Амыр чуртас чолларын олар пілбинчелер. ¹⁸ Худайдаң хорыхханы харахтарында көрінминче.

¹⁹ Піс пілчебіс, Худай Чахии чахығ хоостыра чуртапчатханнарға тееліп, пірдеезін удур чоохтандырбинча. Иди тилекей чоны Худайның алнында пыролығ пол парча. ²⁰ Чахығ киректері хоостыра Аның алнында пірдеезі ахтан полбас. Чахығ піске чазых ниме полчатханын пілерін не пирче.

Киртіністің ахтапчатханы

²¹ Амды, тізен, Худайның ахтазы чахығдаң алынча азыл парған. Анзынаңар чахығ паза ухаанчылар киречілепчелер. ²² Худай киртінчеткен кізілерге прайзына, талластырбин, Иисус Христосха киртіністің пастыра ахтас пирче. ²³ Прайзы чазых иткен, прайзы Худайның сабланызы^c чох халған нооза. ²⁴ Худай прайзын Позының паарсазынаң тикке ахтапча, Иисус Христостың үчүн оларны пос итче. ²⁵ Худай Иисусты чарастырчаң толығ ит салған. Иисустың ханы сылтаанда киртінчеткеннернің чазыхтары позыдылча. Худай кізілернің алында иткен чазыхтарын тастаан паза ахтапчатханын көзіткен. ²⁶ Сағамғы туста Худай, тыстанып, Позының ахтапчатханын көзітче. Иди ол Позы даа сынынча итче паза Иисусха киртінчеткеннерні ахтапча.

²⁷ Амды нименең махтанчаң? Пір дее нименең. Арса, чахығны толдырчатханнаң махтанчаң ма? Чох, чарабас. Киртініснең не махтанарға чарир. ²⁸ Піс тіпчебіс, кізі чахығны толдырғанынаң алай толдырбаанынаң нимес, че киртіністің пастыра ахтанып алча. ²⁹ Худай иудейлернің не Худайы ба? Пасха чоннарның даа

Худайы нимес пе ол? Оларни дее. ³⁰Худай пір ле. Ол киртіністері хоостыра сүннет иттіргеннерні дее, иттірбеен, че киртінчеткеннерні дее ахтапчатхан Худай полча. ³¹Ол ондайнаң піс киртінізібіснең чахығны чох итчебіс пе? Андағ нимес. Піс чахығны пик турғызарға полысчабыс.

Авраамның көзідімі

4 Авраам^с өбекебісті алза, пос күзінең нимее читкен ол? ²Ол киректері хоостыра ахталған полза, аның, Худайға нимес, кізілерге махтатчаң нимезі поларчых. ³Худай Пічии нимеденер чоохтапча? «Авраам Худайға киртін парғаннаңар, Худай аны ахтаан». ⁴Кізі иткен киректерінің үчүн сый алча, анзы, паарсас нимес, төлег полча. ⁵Че кізі, иткені хоостыра нимес, киртінізі пастыра ахтатча. Чазыхтығ кізіні ахтапчатхан Худайға киртінчеткен кізіні Худай ахталған тіп санапча.

⁶Давид тее ідök чоохтапча: «Худай кізіні киректерінің үчүн нимес ахтаза, ол кізі часкалығ. ⁷Сайбағ иткен үчүн пыролары тасталған, чазыхтары ундудылған кізілер часкалығлар. ⁸Хан Худай^с кізінің чазыхтарын санға албаза, ол кізі часкалығ полар». ⁹Андағ часка сүннет иттіргеннерге алай иттірбееннерге дее теелче бе? Піс Авраам киртінізінің пастыра ахталған тіпчебіс. ¹⁰Хачан анзы санал сыххан? Сүннет иттірткенде алай иттірткелекте бе? Соонаң нимес, иттірткелекте полған ол. ¹¹Авраамның сүннет иттірткелектök полған киртінізі үчүн, Худай аны ахталған кізее санаан. Сүннет тании ағаа соонаң ахтас таңмазы чіли салылған. Ол ондайнаң, киртінчеткен кізілер, сүннет иттіртпеен дее ползалар, ахтадарлары үчүн Авраам оларның прайларының пабазы полыбысхан. ¹²Ол ідök сүннет иттірткеннернің пабазы полча. Олар, сүннет иттірткеннең пасха, Авраам пабабыстың киртініс чолынча парчалар. Авраамның ол киртінізі сүннет иттірткелегіндök полған.

Худайның молчағлары киртіністең пастыра алылчалар

¹³Авраам паза аның төлі тиксі-тилекейні холға кирерлеріненер молчағ алғаннар. Ол молчағ Чахығны толдырчатханнаңар нимес, че ахтапчатхан киртіністің хоостыра пирілген. ¹⁴Пу молчағ чахығны толдырчатханнарға ла теелчеткен полза, киртініс тик ниме поларчых, молчағның даа тузазы чох поларчых. ¹⁵Чахығдаң хатығлас килче. Чахығ чох полза, аны сайбааны даа чох полча нооза.

¹⁶Аннаңар прай ниме киртіністең полча паза паарсасха төс-тенче. Аннаңар пу молчағ Авраамның прай төліне, чахығ хоостыра чуртапчатханнарға ла нимес, че Авраам чили киртінчеткен прай кізілерге пик ізеніс пирче. Авраам пістің прайзыбыстың пабазы полча. ¹⁷Худай Пічиінде ідөк пазылығ: «Мин сині көп чоннарның адазы ит салғам». Авраам өліглерні тірілдірчеткен паза чох нимені пар итчеткен Худайға киртін парғаннаңар, Худайның көрізінде пістің пабабыс улыбысхан. ¹⁸Пір дее ізеніс халбаанда даа, Авраам ізеніп ала киртінген. Аннаңар ол көп чоннарның пабазы улыбысхан. «Синің төлің анча көп пол парар» ағаа теені хоостыра ол көп чоннарның пабазы улыбысхан. ¹⁹Ағаа чўс часха чағдабысханнаңар иді-ханының күзі сыхчатханын пілінзе дее, Сарра, тізең, тың киріп, пала көрерінен ирт парған даа полза, Авраам тың киртінген нооза. ²⁰Худайның молчаа толарын сала даа ікінчїлебин, ол киртінізіңде улам пик турып, Худайны саблаан. ²¹Молчағны толдырарға Худайның күзі парына Авраам тың киртінген. ²²Аннаңар Худай аны ахтатхан кізее санаан.

²³«Аны ахтатхан кізее санаан» теені Авраамға ла нимес, ²⁴че піске дее теелче. Піс Хан-пигібіс Иисус Христосты өліглердең тірілдірібіскен Худайға киртінчебіс. Ол пісті дее орта чоллығ кізілерге санир. ²⁵Христос пістің чазыхтарыбыстың үчўн өлімге ызылған паза пістің ахтадарбыстың үчўн тіріл парған нооза.

Аның Ханынаң ахтанғаны

5 Піс киртінізібіс пастыра ахтанып алғаныбыста, Хан-пигібіс Иисус Христостаң пастыра Худайнаң ынағ пол парғабыс. ²Иисус Христостаң пастыра, киртінізібістің сылтаанда ам піске пирілген паарсасха читтібіс паза Худайыбыстың сабланызын ўлезерге ізеніп, тың өрінчебіс. ³Анзына ла нимес, чобағларыбысха даа өрінчебіс. Чобағлар тыстанарға ўгретчеткеннерін пілчебіс нооза. ⁴Тыстанып, піс сынағ иртчебіс. Сынағдаң, тізең, ізеніс төріпче. ⁵Ізеніс пісті уйатха кирбес. Худай, піске Худай Худын пиріп, чўрекерібіске Позының хынызын ур пирген нооза.

⁶Піс күс-сағ чох полғаныбыста, Христос пістің үчўн ол парған. Тузы читкенде, Ол Худайны улуғлабинчатхан кізілернің үчўн ол парған. ⁷Арығ чўректіг кізінің дее үчўн піреезінің өлері ікінчїлестіг. Итсе, чохсы кізінің үчўн тынын пирерге иткен піреезі табыл таа парар. ⁸Худай піске Позының хынызын көзіт

пирген. Христос, піс чазыхтыҥ чөрген тустох, пістің үчүн ол парған нооза. ⁹ Амды піс Христостың өлімінең ахтанып алып, Худайның чарғызынаң Аның пастыра улам озып аларбыс. ¹⁰ Піс Худайнаң ыырласхан туста Ол піснең Позының Оолғының өлімінең пастыра чарас салған. Ам, тізең, чарас салғаныбыста, Аның чуртазы пастыра улам арачылан поларбыс. ¹¹ Піс анзына ла махтанминчабыс. Хан-пигібіс Иисус Христостың пастыра Худайни полчатханыбысха махтанчабыс. Аның сылтаанда піс Худайнаң чарас салғабыс.

Адам паза Христос

¹² Ол ондайнаң пір кізінең пастыра тилекейге чазых кірген. Чазыхнаң хада, тізең, өлім килген. Иди өлім прай кізілерге килген. Прайзы чазых ит салған нооза. ¹³ Чазых тилекейде Чахыҥ салылғалахтох полған. Че Чахыҥ турғызылғалахта, чазых үчүн пыролиры кирілгелек полған. ¹⁴ Өлім, тізең, Адамның^c тузынаң пасти, Моисейге^c теере үлгү салған. Ол Адам иткен чазыхха төй сайбағны итпеен кізілерге дее үлгү тутхан. Адам килер кізінің омазы полған.

¹⁵ Че Худайның сыйии сайбағ осхас нимес. Пір кізі ит салған чазых үчүн көп кізі ол парған. Худайның паарсазы, Аның паарсастыҥ сыйии хай-хай көп пирілче. Ол паарсас пір кізінің, Иисус Христостың сылтаанда көп кізее азыра даа пирілче. ¹⁶ Худайның сыйиин Адамның чазығынаң тиннирге чарабас. Пір чазыхтың үчүн чарғы полчаң, пыролатчаннар. Паарсас сыйии, тізең, көп сайбағлардаң ахтанарға пирілче. ¹⁷ Пір сайбағ иткен пір кізінің үчүн өлім үлгүні холға кирген. Худайның пай паарсазын паза ахтаныстың сыйиин алчатхан кізілер пір Кізіден, Иисус Христостың пастыра чуртаста улам үлгү тударлар.

¹⁸ Ол ондайнаң пір кізінің сайбағ иткені прай кізілерні чарғылапча. Сах идөк пір кізінің сын иткені прай кізілерні Худайның алнында ахтап, оларға чуртас пирер. ¹⁹ Пір кізінің чоох испеені үчүн көп кізі чазыхтыҥ пол парған. Сах идөк пір кізі чоох икенинің үчүн көп кізі ахтанып алар.

²⁰ Аның соонаң Чахыҥ пирілген. Иди чазыхтың көбі көзиділ парған. Чазых көптел парғанда, паарсас улам ас сыххан. ²¹ Чазых, өлімге ағылып, үлгү тутхан. Идөк паарсас ахтаныстың пастыра үлгү тудып, пісті Хан-пигібіс Иисус Христостың пастыра мөгі чуртасха ағылча.

Чазыхха өліглер, Христоснаң хада тіріглер

6 Ниме піс тирбіс? Худайның паарсазы піске хозылып одыраp үчүн, чазыхта чөерге кирекпіс пе? ²Чох, андағ нимес. Піс чазыхха өл парғабыс, чазыхтың чуртап поларбыс па? ³Піс кіреске түскенде^c, Иисус Христостың чардығы улыбызып, Аның өлімін дее үлескенібісті пілбинчезер бе? ⁴Иди піс, кіреске түзіп, Анынаң хада өл парғабыс. Пісті Аннаң хада чыып салғаннар. Христос Пабазының илбек күзінең тірілдіріл парған. Идөк піс тее наачылал парып чуртирбыс.

⁵Піс, Аннаң хада пірік парып, Ол чіли өл парғаныбыста, Аннаң хадох тіріл парарбыс. ⁶Алындағы позыбыс Иисуснаң хада кіреске^c хазат салғанын піс пілчебіс. Анзы пістің чазыхтың ит-ханыбыс піске үлгү салбазын тіп, піс чазыхтың хулары полбас үчүн, иди иділген. ⁷Кем өл парча, ол чазыхтаң позып парча нооза. ⁸Піс Христоснаң хада өл парғаныбыста, Аннаңоҳ хада чуртирыбысха киртінчебіс. ⁹Өліглердең тірілдірткен Христос паза өлбезін пілчебіс нооза. Өлім Ағаа үлгүзін тут полбас. ¹⁰Ол өлгенде, чазыхха санайға өл парған. Чуртап, тізең, Худайға чуртапча. ¹¹Сіреpге дее постарыңны, чазыхха өлігзер, Худайға пістің Хан-пигібіс Иисус Христоста чуртапчазар тіп, санирға чарир. ¹²Аннаңар өлчең иди-ханыңарда чазых үлгү тутпазын, аның хынығыстарыңча полбаңар. ¹³Идінернің чардыхтарың пирдеезін чазыхтың үлгүзіне пирбенең, чабалның тириине айландырбаңар. Өліглердең тіріл парған постарыңны, сынның тирии иди, Худайның үлгүзіне пир салыңар. ¹⁴Чазых сіреpге үлгүзін паза салбас. Сіреp амды паза чахығның холында нимессер, Худайның паарсазында чөрчезер нооза.

¹⁵Нимедір зе, чахығның холында ниместе, Худайның паарсазында чөрчеткенібісте, чазых идерге кирекпіс пе? Чох, андағ нимес. ¹⁶Пілбинчезер бе, посты піреезіне хул поларға пирін салза, чооғын искен кізінің хулы поларзар. Чазыхтың хулы улыбыссар, анзы өлімге ағылар. Худайға хул улып, Аның чооғын иссер, анзы сіреpні ахтанысха ағылар. ¹⁷Сіреp чазых хулары полғазар. Че, Худайнаң, прай чүректеріңнең сіреpге пирілген үгредіге тудынарға чарат салғазар. ¹⁸Чазыхтаң позып улып, сіреp орта чуртасха хул улыбысхазар.

¹⁹Сіреp күс-сағ чохтарыңнаңар, мин мыны кізі синче чоохтапчам. Алында сіреp ит-ханыңарны сайбахха, чабал киректерге

хул иткезер. Олох ондайнаң амды аны ахтаныстың хулы идібізі-нер. Андада сірер ах-арығ полыбызарзар. ²⁰Сірер чазыхтың хуллары полғаннарында, орта чоллығ кізілер полбаазар. ²¹Андада хайдағ парыс алдыңар? Ол туста иткен нимелердең пўўн сірерге уйадыстығ. Ол киректер өлімнең тоозылчалар. ²²Амды, тізең, сірер, чазыхха хул поларынаң поэзып алып, Худайның хуллары пол парғазар. Сірер ах-арығ кізілер пол парғаннаң парыстанып алғазар. Аның салтары мөгі чуртас полча. ²³Чазыхтың төлее өлім, нооза. Худайның сыйии, тізең, Хан-пигібіс Иисус Христоста мөгі чуртас.

Чахыға өліглер

7 Харындастар, мин мыны сірерге, чахығны пілчеткен кізілерге, чоохтапчам. Кізі тірігде ле чахығның холында чөрче. Анзын пілче полбассар ба? ²Ирі изен чөргенче ле, Чахығ ипчизін аннаң палғалыстырча. Ирі үреп парза, ол ипчі ирінең палғалыстыр салған чахығдаң поэзып парча. ³Аннаңар ирі изенде, пасха ирнең чөрібіскен ипчі чөреес ипчі тіп адалар. Че ирі үреп парза, ол чахығның ұлғүзінең сых парар: пасха ирнең чуртап сыхса даа, чөреес ипчее саналбас.

⁴Сірер дее, харындастарым, Христоснаң хада өліп, чахыға ол парғазар. Пасха, өліглердең тіріл парған кізіни пол парғазар. Худайға парыс ағылар үчүн чуртааңар.

⁵Піс ит-ханның ондайынча чуртааныбыста, чахығ чазыхтығ хычыхтарыбысты ілее сығарған. Ол хычыхтарыбыс идібіснең устап, пісті өлімнең парыстандырчаннар. ⁶Амды, тізең, пісті тузахтапчатхан чахыға ол парғаныбыста, піс аннаң поэзып парғабыс. Алында пазылған чахығдаң хоостыра нимес, Худай Худының пастыра наачылалып, Худайның нымызында чөрербіс.

Чахығ паза чазых

⁷Ниме піс тирбіс? Чахығ чазыхтығ полча ба? Чох, андағ нимес. Чахығдаң пастыра ла мин чазых ниме полчатханын піліп алғам. Чахығ «Хычыхтанма» тібеен полза, мин хычых ниме полчатханын пілбестеечікпін. ⁸Че чазых, тізең, чахығнаң тузаланьп, минде аймах хычыхтаныстар сығар килген. Чахығ чох полза, тізең, чазых таа чоғылох. ⁹Мин хачан-да чахығ пілбин чуртаан полғам. Че хачан чахығ килгенінде, чазых тіріл парған. ¹⁰Мин, тізең, ол парғам. Иди чуртас пирчең чахығ сөзі мағаа

өлім ағылған. ¹¹ Чазых, чахығнаң тузаланып, мині алаахтыр салып, өлімге ағыл салған. ¹² Чахығ ызых^с ниме, чахығ сөзі дее ызых, орта паза чаксы ниме полча. ¹³ Андағ полза, чаксы ниме мині өлімге ағылча ба? Чох, андағ нимес. Сынында чазых, чаксы нименең тузаланып, мині өлімге ағылған. Ол ондайнаң чахығның сылтаанда чазыхтың улам чабал полчатханы азылған.

Хуттың паза ит-ханның күрескені

¹⁴ Чахығ Хуттаң пирілчеткенін піс пілчебіс. Мин, тізең, ит-ханныңбын, чазыхха садыл парғам. ¹⁵ Ниме итчеткенімні оңарбинчам нооза. Идерге хынған нимені итпинчем, позым хырт көрінчеткен нимені, тізең, итчем. ¹⁶ Хынминчатхан нимені итчетсем, чахығ чаксы тіп, чөпке кірчем. ¹⁷ Ол ондайнаң мин нимес, минде чуртапчатхан чазых анзын итче. ¹⁸ Минде, иді-ханымда, чаксы ниме чоғын пілчем: чаксы ниме идерім килче, че ит полбинчам. ¹⁹ Чахсы ниме идерге хынып, мин аны итпинчем, чабал ниме идерге хынмазам даа, итчем нооза. ²⁰ Хынмаан нимені итчеткенде, андағда мин нимес, минде чуртапчатхан чазых аны итче.

²¹ Піди сизінгенімде, ондайым мындағ: чаксы идерге сағынзам, мин позымның чабалымны көрчем. ²² Істімде мин Худай Чахиина чөпсінчем. ²³ Че ит-ханымның чардыхтарында пасха чахығ көрчем. Ол, минің сағызымның чахиина тоғырланып, ит-ханымдағы чазыхтың чахиинаң тузахтап салча. ²⁴ Хайран кізібің! Пу өлімнің ит-ханымнаң кем мині позыдыбысчаң полчаң? ²⁵ Алғас ползын Худайға, Ол анзын Иисус Христостың, Хан-пигібістің пастыра ит салған. Ол ондайнаң мин сағызымнаң Худай Чахиина нымысчы полчам, ит-ханымнаң, тізең, чазыхтың чахиина нымысчы полчам.

Худай Худында чуртааны

8 Ол ондайнаң пүүн Христос Иисуснаң ит-ханның ондайынча нимес, Хуттың хоостыра чуртапчатханнар чарғылатпастар. ² Христос Иисустың пастыра чуртасты пирчеткен Худай Худының чахи мині чазыхтың паза өлімнің үлгүзінең позытхан. ³ Моисей Чахия^с анзын ит полбаан. Ит-ханыбыс аның күзін сығарыбысхан. Аннаңар Худай Позының Оолғын, чазыхтығ ит-ханның кізее омалап салып, ысхан. Худай Аны чазыхтың үчүн толығ ит салған. Иди Худай ит-ханның ондайынча иткен чазыхты чарғылап салған. ⁴ Худай анзын пісте, ит-ханның ондайынча

нимес, Хуттың хоостыра чуртапчатханнарда, чахыҕ киректеп-четкен ниме толзын тіп, іди иткен. ⁵Ит-ханның ондайынча полчатханнарның сағыстары ит-ханның хынығыстарын толдырарына айлан парча. Худай Худы хоостыра полчатханнар, тізең, Худай Худының көннине чуртирға сағынчалар нооза. ⁶Пос көннине полғаны кізіні өлімге ағылча. Худай Худы хоостыра полғаны, тізең, чуртасха паза амыр хоныхха ағылча. ⁷Кізінің пос көннине полғаны Худайға тоғыр. Аның үчүн кізі Худай Чахиинның үлгүзіне кірбинче, сынында кір полбиндаача. ⁸Ит-ханның ондайынча чуртапчатхан кізілер Худайның көннине кір полбастар.

⁹Худай Худы сыннан сірерде чуртапчатса, сірер, ит-ханның ондайынча нимес, Худай Худының хоостыра чуртапчазар. Кемде Христостың Худы чоғыл, тізең, ол Христости нимес. ¹⁰Сірерде Христос пар полза, ит-ханыңар чазыхтыҕдаңар өліг дее полза, че Хут ахтаныстың сылтаанда тіріг. ¹¹Иисусты өліглерден Тірілдірібіскеннің Худы сірерде чуртапча. Андаҕ полза, Христосты өліглерден Тірілдірібіскені сірерде чуртапчатхан Позының Худынаң өлчең иди-ханыңарны тірілдірібгізер.

¹²Аннаңар, харындастар, піс ит-ханға алымның нимеспіс. Ит-ханның ондайынча чуртирға кирек чохпыс. ¹³Сірер ит-ханның ондайынча полчатсар, өл парарзар. Ит-ханның хынығыстарын Худай Худынаң пазынып алзар, чуртирзар. ¹⁴Худай Худынаң устанчатхан кізілер прайлары Худайның палалары полчалар. ¹⁵Хул итчеткен паза хорығып ала чуртатчатхан хутты сірер албаазар. Сірерні Худай палалары итчеткен Худай Худың алғазар. Пу Хуттың пастыра піс хығырчабыс: Авва* Пабам! ¹⁶Худай Худы пістің худыбыснаң хада піс Худайның палалары полчатханыбысты киречілепче. ¹⁷Худайның палалары полчатханыбыста, Христоснаң тине Аннаң үлүсті алчаң кізілер полчабыс. Христостың ирееленістерін үлескенібісте, сабланызын даа үлербіс.

Чаҕдапчатхан сабланыс

¹⁸Пістің пүүңгі ирееленістерібіс піске килер сабланыстың хыринда пір дее нимее турбинчалар тіп санапчам. ¹⁹Прай чайалған ниме Худай палалары кем полчатханын азыларын чидікпин

* 8:15 Арамей тілінең «Авва» тесні Пабам полча.

сағыпча нооза. ²⁰⁻²¹ Прай чайалған ниме, позының нимес, Худайның көннiнче тик чуртастың үлгүзiнде чөрче. Чайалған нименiң, чызирдаң позып алып, Худайның палаларының пос чуртазын паза сабланызын аларларына iзенiс пар. ²² Пiс пiлчебiс, прай чайалған нимелер пу тусха теере, өстеziп ала, чобалчалар. ²³ Олар ла нимес, пiс тее, Хуттаң тун-сый алған кiзiлер, пос алынча чобал чөрчебiс. Худайның палалары поларыбысты паза ит-ханыбыс чазыхтаң позирын сахтапчабыс. ²⁴ Хацан пiс iзенчебiс, пiс арачыланып алчабыс нооза. Харахха көрiнчеткен ниме iзенчетсең, ол iзенiс нимес. Көрчетсең, ноға iзенерге кирек. ²⁵ Көрiнминчеткен ниме iзенчетсебiс, андада тыстанып ала сагыпчабыс.

²⁶ Олох ондайнаң чазығ позыбысха Хут полысча. Пiс хайди пазыраын паза хайди сурынарға кирегiн пiлбинчебiс нооза. Хут, чоохтанмин даа, улуг тынғанынаң на пiстiң үчүн сурынча. ²⁷ Чүректернi сынапчатхан Худай, тiзең, Хуттың сағызын пiлче: Хут Худайның көннi хоостыра ах-арығларның үчүн сурынча нооза. ²⁸ Пiс, тiзең, пiлчебiс, Худайға хынчатханнарға паза Аның көннi хоостыра хығыртылғаннарға прай ниме чахсаа идiлче. ²⁹ Худай пурун пiл салған кiзiлерге, Позының Оолғы көп харындастарының аразында тун палазы ползын тiп, Позының Оолғына төйй поларға турғыс салған. ³⁰ Кемнi турғыс салған, тiзең, оларных хығыртхан. Кемнi хығыртхан, оларных ахтаан. Кемнi ахтаан, тiзең, оларных саблаан.

Худайның хынызы Иисус Христоста

³¹ Мыннаң хоостыра паза ниме тир? Худай пiстiң үчүн полчатханда, кем пiстең тоғыр полар? ³² Ол Позының Оолғына айабаан, пiстiң прайзыбыстың үчүн пир салған. Аннаң хада пiске прай нименi сыйлап пирбес пе? ³³ Худай таллааннарны кем пыролир? Худай оларны ахтапча. ³⁴ Кем чарғылир? Пiрдеезi. Христос Иисус ол парған, че тiрiл парған. Ол Худайның оң саринда одырча паза пiстiң алныбысты алча. ³⁵ Кем пiстi Худайның хынызынаң чар полар: ирееленiстер алай сидiксiнiстер, алай сүрдiртчеткенiбiс, алай өзөгiс, алай чох чуртас, алай хорғыс, алай хылыс па? ³⁶ Пiди пазылых: Синнең үчүн пiс күннiң сай өлiм көрчебiс, пiстi тайыға^c салчаң хойларға санапчалар.

³⁷ Прай пу нименi пiске хынчатхан Худайның сылтаанда чиңп алчабыс. ³⁸ Iкiнчiлебинчем, өлiм дее, чуртас таа, ангеллер^c

дее, пастыхтар даа, амғызы даа, соңархызы даа, хайдағ даа күстер, ³⁹ пөзии, тирии пісті Худайның хынызынаң чар полбастар. Пір дее чайалған ниме Иисус Христос Хан-пигібістің пастыра пірілчеткен Худайның хынызынаң пісті чар полбас.

Худай паза Аның чоны

9 Христоснаң пір полып, мин сынны чоохтапчам, чойлан-минчам. Мағаа Худай Худы чарытхан чүреем киречілепче. ² Улуғ чобағ паза тохтабинчатхан ағырығ минің чүреемде. ³ Харындастарымның үчүн позым даа Христостаң хыйа итірге тимдебін. Олар минің туғаннарым, пір чон төлі, ⁴ Израиль чоны полчалар. Оларны Худай Позына пала идінер үчүн таллап алған, оларға Позының сабланызын асхан. Худай оларнаң молчас салған, оларға Чахығ пирген, оларға Худайға пазыраын пирген паза оларға сөс пирген. ⁵ Илбек өбекелер оларның пабалары полчалар. Иді-ханы хоостыра Христос таа оларның төлі полып төреен. Ол хақанға даа прай нименің алғыстығ Худайы полча. Аминь.

⁶ Че мин Худайның пирген сөзі күзін чідір салған тібинчем. Израильдең сыхханнары прайзы ла израиль чоны ниместер нооза. ⁷ Ідөк Авраамнаң төрееннері дее прайзы аның төлі нимезөк. Че піди чоохталча: Исаактаң төреені синің төлің адалар. ⁸ Пасха сөстернең чоохтаза, кізіден төрееннері нимес, молчағ сөзі хоостыра төрееннері Авраамның төлі тіп саналчалар. ⁹ Молчағ сөзі мындағ: пазағы чылда пуох туста килербін – Сарраның оол пала полар.

¹⁰ Анзы ла полбаан. Ревекканаң даа ідөк полған. Ол пабабыс Исаактаң ікі палазынаң аар чөрчеткен. ¹¹⁻¹² Палалар төреелекке дее, чахсы даа, чабал даа ниме иткелектерінде, ағаа чоохталған: «Улии кічиинің хулы полар». Иди Худай Позының пөгіні Позы таллаанынаң толдырылчатханын көзіткен. Ол кізінің киректеріне көрбин, Позы хығыртхан кізіні таллидыр. ¹³ Піди пазылых: Иаковха^c мин хын парғам, Исавха, тізең, хырт көр сыххам. ¹⁴ Ол ондайнаң ниме тирбіс? Худай саба итче бе? Чох, андағ нимес. ¹⁵ Ол Моисейге піди тіпче нооза: Өлчей пирерге итсем, өлчей пирербін. Айирға итсем, айирбын. ¹⁶ Ол ондайнаң прай ниме кізінің көңнінең нимес, аның күстенгенінең нимес, че өлчей пирчеткен Худайның көңнінең полча. ¹⁷ Худай Позының Пічинде фараонға тіпче нооза: Мин сағаа Позымның күзімні

көзідерімнің паза Минің Адым прай чир үстүне сабланарының үчүн сині турғыс салғам. ¹⁸ Ол оңдайнаң Худай, хынза, кізее өлчей пирче, хынмаза, тізең, аны өчес ит салча.

Худайның өкпезі паза Худайның паарсазы

¹⁹ Син, хынза, мағаа тирзін: «Нименің үчүн Ол пыролапча? Кем Аның көңніне тоғырлан полар?» ²⁰ Кемзін син, кізі, Худайға удурлазарға? Устың холы иткен ниме «Ноға син мині мындағ иткезін?» тіп полар ба? ²¹ Той-палғас ус кізінің холында нимес пе? Ус кізі аалчыларға даа, иб аразында даа тудынчаң ідістерні пір тойдаң ит полча нимес пе?

²² Худай Позының өкпезін читірерге паза Позының күзін көзідерге хынған. Аның өкпезін туттырған паза өлімге турыстығ кізілерні айап, Ол үр сыдасхан. ²³ Олох туста Худай өлчей пирген кізілеріне Позының пай сабланызын көзідерге хынған. Худай оларны сабланысха тимнеп салған полған. ²⁴ Ол хығыртхан кізілер піспіс: Иудейлер ле нимес, пасха даа чоннар. ²⁵ Анзынанар Ол ідөк Осий ухаанчының киндезінде чоохтапча: «Минің чоным нимес чонны Минің чоным тіп адап саларбын. Хынғаным полбаанын хынғаным тіп адап саларбын». ²⁶ Пірсінде оларға «Сіреп минің чоным нимессер» тіп чоохталған. Сах олох орында олар «Тіріг Худайның ооллары» адал парарлар. ²⁷ Исайй, тізең, Израильденер чарлапча: Израиль ооллары талайдағы хум осхас көп ползалар даа, артхан-халғаны ла арачыланып алар. ²⁸ Хан Худай чир-чалбахта Позының сөзін тідімніг паза табырах толдыр салар нооза. ²⁹ Исайй дее Израильденер ідөк чарлаан: Прайзынаң күстіг Хан Худай артхан-халған чонын халдырбаан полза, піснең, Содом саарнаң полған чіли, Гоморра саарнаң полғанға төйй пол парарчых.

³⁰ Ол оңдайнаң ниме тирбіс? Ахтаныс тілебеен Худайы чох кізілер киртіністің пастыра ахтаныс алып алғаннар. ³¹ Ахтапчатхан чыхыға харасхан Израиль чоны, тізең, ол чыхыға чит полбаан. ³² Ноға? Киртіністе нимес, чыхығның киректерінде аны тілееннерінеңер. Олар харылчаң тасха харыл парғаннар. ³³ Пазылғаны хоостыра: мына Сионда харылчаң тас паза аңдарылчаң тас салчам. Че киртінчеткен кізі Аннаң үчүн уйатха кірбес.

Павелнің Израильнің үчүн пазырғаны

10 Харындастар! Мин, Израиль чоны арачыланып алзын тіп, тың хынчам паза анзынаңар Худайға алданчам. ² Мин оларға киречілепчем: олар Худайның көнніне кірерге тың құс-тенчелер, че хайди аны идерін пілбинчелер. ³ Худайның хайди ахтапчатханын пілбин, олар постары ахтанып аларға харасчалар. Аның үчүн олар постарын ахтапчатхан Худайның холына пирбееннер. ⁴ Христос, тізең, Чахығның толдырылғаны полча. Ағаа киртінчеткен полған на кізіні Худай ахтапча.

Полғаны ла арачылан полар

⁵ Моисей Чахығ пастыра ахтапчатханынаңар пасча: Чахығны толдырчатхан кізі тіріг чөрер. ⁶ Киртіністің хоостыра ахтааны, тізең, піди тіпче: Христосты түзіріп аларға иткен чіли «Кем тигірзер өөрлир?» тібе. ⁷ Христосты өліглердең көдіріп аларға иткен чіли «Түбі чох чирзер кем түзер?» дее тібе. ⁸ Ниме тіпче Худай Пічии? «Сөс сағаа чағын, ол синің аазында, синің чүреенде». Пу піс үгретчеткен киртіністенер сөс полча. ⁹ Син аазыңнаң Иисус Хан-пиг полчатханын чарлапчатсаң, чүрееннең Худай Аны өлігдең тірілдірібіскенге киртінчетсең, арачыланып аларзың. ¹⁰ Чүрекнең киртінгені ахтаныс пирче, аастаң чарлааны арачыланыс пирче. ¹¹ Худай Пічии киртінчеткен кізі Аннаң үчүн уйатха кірбес тіп чоохтапча нооза. ¹² Иудей бе, иудей немес пе, пасказы чоғыл. Хан Худай прайзының пір. Аны хығырчатханнарға прайзына Ол Позының пайын пирче. ¹³ Хан Худайның адын хығыртхан ноо даа кізі арачыланып алар.

¹⁴ Ағаа киртінмееннерінде, Аны хайди хығырарлар? Аннаңар испееннерінде, Ағаа хайди киртінерлер? Ұгретчеткен кізі чох хайдаң истіп аларлар? ¹⁵ Ұгредерге ызылбаан кізі хайди үгрөдіп алар? Піди пазылых: Чахсы Хабарны чарлапчатханнарның килгені хайдағ манаттыр. ¹⁶ Че Чахсы Хабарны прайзы ла тыңнабаан. Исайи тіпче: Хан Худай! Пістең искен нимее кем киртінді? ¹⁷ Ол ондайнаң киртініс Чахсы Хабарны искеннең килче. Чахсы Хабар, тізең, Худайдаң сөстең пастыра искірілче. ¹⁸ Че мин сурчам: олар испееннер бе? Чох, искеннер. Прай чир-чалбахха хабар истілген, тилекейнің хыри-пазына сөстер тарааннар. ¹⁹ Пазох сурчам: Израиль пілбеен ме? Чох, пілген. Алындох Худай сөстерінең Моисей теен: пасха чонның пастыра чүректеріңе

күннес кирербін, оңарбас чонның пастыра сірерні хыпчыхтандырабын. ²⁰ Исай, тізең, тідімніг чоохтапча: «Мині тілебеен-нері мині тапханнар. Миннеңер сурбааннарға азыл пардым». ²¹ Израильдеңер, тізең, тіпче: күн тооза мин чоох испес паза өчес чонзар хучаам асхам.

Израильге Худайның паарсазы

11 Ол ондайнаң мин сурчам: нөөс Худай Позының чонын хыйа идібискен? Чох, андағ нимес. Мин дее Израиль чонынаңмын, Авраамның төлінеңмін, Вениаминнің уйазынаңмын. ² Худай Позының азынада пілген чонын хыйа сүрбеен. Алай Худай Пічиинде Илия ухаанчыдаңар ниме пазыл парғанын пілбинчезер бе? Илия Израиль чонын Худайға піди хоптаан: ³ «Хан Худай! Ухаанчыларыңны өдір салғаннар, тайығ салчаң орыннарыңны сайбап салғаннар. Чалғыс мин не халдым, минің тынымны аларға мині тілепчелер». ⁴ Худайның нандырии ағаа ниме чоохтапча? «Мин Позыма Ваалның алнында тізекке түспеен читі муң кізіні халғызып алғам». ⁵ Сағамғы туста даа Худайның паарсазы хоостыра таллалған чоны арт халған. ⁶ Худайның паарсазы хоостыра таллалған ползалар, іди таллааны киректер хоостыра таллааны полбас. Киректер хоостыра таллаза, анзы паарсас полбас.

⁷ Андағда нимедір зе? Израиль тілепчеткен нимезіне чит полбаан. Таллалғаннары ла анзына чидіп алғаннар. Пасхаларының, тізең, чүректері хатхлап парғаннар. ⁸ Піди пазылыx: Худай оларны уйғаа пастыр салған, пу күнге теере харахтарын көрбес, хулахтарын испес ит салған. ⁹ Давид тее тіпче: оларны тосхырчатхан ниме постарына тузах ползын, хахпан ползын, оларны харылдырзын, иткеннеріненөк нандырзын. ¹⁰ Харахтарына көрбес иде харасхы тус парзын, арғалары хачан даа пүгүр чөрзіннер.

¹¹ Ол ондайнаң мин сурчам: олар саңай аңдарыл парыбызарға тіп, харыл парды полчаңнар ба? Чох, андағ нимес. Че олар аңдарыл парғаннарында, арачыланыс пасха чонға килген. Анзы Израильні күннеттіртер үчүн иділген. ¹² Оларның аңдарылғаны тилекейні пайыт салған, уттырғаны пасха чоннарны пайыт салған. Андағ полза, прай Израиль Худайға айланза, улам артых полар.

Пасха чоннарның арачыланьызы

¹³ Сірерге, Худайы чох кізілерге, тізең, чоохтапчам: мин, пасха чоннарзар ызылған илчі, позымның тоғызымны саблапчам. ¹⁴ Арса, пір сөөк кізілерімнің чүректерін күннеттіртіп, піреезін іди арачылап алчанмын ма? ¹⁵ Худайның олардан хыйа айланыбысханы Аның пасха чонға чарастырығ пиргені полған нооза. Худай иудейлерні Позынзар хатап алза, тізең, ниме полар? Анзы өліглерні тірілдіргені паза чуртас пиргені полар. ¹⁶ Халастың пастағы кизегі Худайға чарыдылчатса, прай даа халас ах-арығ пол парча. Ағастың чилегезі ах-арығ полза, салаалары даа ызых полчатпастар ба.

¹⁷ Олива ағастың пірее салаалары сынглап парып, оларның орнына синің, чазы оливазының салаазы өскіріл парза, пір тамырлығ пол парчазар. Ол чохсы ағастаң құс тартынчазың. ¹⁸ Салааларының алнында махтанма. Махтанчаң нимең пар ба? Син тамырларны тутпинчазың. Олар сині тутчалар.

¹⁹ Син, арса, тирзің: «Мині өскір салар үчүн, пу салаалар сындырыл парғаннар». ²⁰ Чохсы. Олар киртіністері чох полғаннаңар сындырылғаннар. Син, тізең, киртінчеткеніңнің үчүн өсчезің. Син көкеесімненме, хорығып одыр. ²¹ Худай ағастың позының салааларын айабаанда, сині дее айабазох.

²² Худайның паарсах таа, хатығ даа хылынчатханын сизініп одыр: Позынаң хыйа полыбысханнарға хатығ хылынча, Худайның паарсазында чөрерге күстенчетсең, паарсах полар. Андағ полбаза, син дее кизіл парарзың. ²³ Тігілер дее, киртініс чох чуртабазалар, хатап чапсыра өскіріл парарлар. Худайның хатап чапсыра өскір салар күзі пар нооза. ²⁴ Син, чазы олива ағазынаң кизіл парып, чир салылған ондайына тоғыр полып, чохсы олива ағазына чапсыра өскіріл парғазың. Чохсы ағастың кизілген салаалары, тізең, постарының ағастарына улам артых чапсыра өс парчатпастар ба.

Худайның прай кізілерге наарсапчатханы

²⁵ Сірерге, харындастар, пір чазытты ас пирерге сағынчам. Постарыңнаңар улуғ сағынманар. Израиль чоңының хай пірее-лері өчес ондайларына пастыр салғаннар. Анзы саңайға нимес, че пасха чонның толдыра саны Худайға килер тусха ла теере. ²⁶ Іди прай Израиль арачыланып алар. Піди пазылых: «Сионнаң

Осхырығычы киліп, Иаковтың Худайны улуғлабинчатханын хыйа тастир». ²⁷ «Пу Минің оларнаң Молчаам полар. Мин оларны чазыхтарынаң позыдыбызарбын». ²⁸ Чаксы Хабар сірерзер килер үчүн, олар Чаксы Хабарға ыырчылар чіли хайчалар. Итсе, иудейлер Худайның таллаан чоны полчалар, паза обекелерінің үчүн Худай оларға хынча. ²⁹ Худай сыйыхтарын нандыра албинча паза таллаанынаң төдірленминче. ³⁰ Сірер дее тузында Худайның чооғын испеен полғазар. Амды, тізең, оларның чоох испееннерінің үчүн, Худай сірерні айап пирген. ³¹ Худай сірерні айир үчүн, олар амды чоох испес пол парғаннар. Арса, оларға даа Худай өлчей пирер. ³² Худай айиры үчүн, прайзын чоох испес ит салған.

Худайны саблааны

³³ Худайның хыйғазы паза пілізі хайдағ илбектір! Аның пөгіннерін пілчее чоғыл, Аның чолын чолласчаа чоғыл. ³⁴ Худайның сағызын кем піліп алған? Кем Ағаа чөп пирген? ³⁵ Алай піреезі Худайға, алымны айландырзын тіп, алымға пірее ниме пирген ме? ³⁶ Прай ниме Аннаң полча, прай ниме Аннаң пастыра паза Ағаа полча. Ағаа хачанға даа сабланыс ползын. Аминь.

12 Аннаңар, харындастар, Худай сірерні айаанның үчүн, сірерге алданчам, постарыңны Худайға пир салыңар. Худайның көңніне чарас тіріг, ах-арығ тайығ иткені ползын ол. Анзы Худайға орта пазырғаны полар. ² Пу тилекейнің ондайынча чуртабаңар, че сағыс-көгістеріңні наачылап, постарыңны алыстырыңар. Андада сірер Худайның көңні хайдағ полчатханын сынап аларзар: ниме Ағаа чаксы, чаразых паза көңніне толдыра.

³ Мағаа Худайдаң пирилген паарсазының хоостыра сірерге прайларына чоохтапчам: улуғсырхабанар, постарыңнаңар синінең азыра улуғ сағынманар. Пазымның, Худай синеп пирген киртіністеріңнің хоостыра сағыныңар. ⁴ Пістің иди-ханыбыс көп сөөк-чүлліг, че олар прайзы пір төөй тоғынминчалар. ⁵ Піс тее көппіс, че Христоста пір ит-ханныңбыс. Полғанын на пос алынча алза, тізең, ол пасхаларына ит-ханның пір чардығы ла осхас. ⁶ Худайның пирген паарсазы сылтаанда піс полғаныбыс ла Аннаң аймах сыйыхтар алғабыс. Ухаанчылиры пирилген полза, киртінізіңнің хоостыра ухаанчыла. ⁷ Пасхаларының нымызына чөрері пирилген полза, аны толдыр. Ёгретчі полары пирилген

полза, үгрет. ⁸Часхарары пирилген полза, часхар. Ұлезері пирилген полза, азых көнніңнең ұлес. Устиры пирилген полза, анзын харазып ит. Чахсы идери пирилген полза, чалахай көнніңліг итчет.

⁹Хыныс чойырхос полбазын. Чабалны хырт көрінер. Чахсы нимее тартылынар. ¹⁰Удур-төдір паарсазып, харындастар чили, хынызынар. Улуғлазарында пірсі пірсінең пуруннирға кўстенінер. ¹¹Піди харазып, пос салынманар. Көнніңінер чалбыразын, Хан-пигнің нымызын толдырчадынар. ¹²Ізеніс парда, өріністіг полинар, чобағда тыстаныстығ полинар, сыбыра пазырчадынар. ¹³Ах-арығларның піреезі хызылчатса, оларнаң ұлесчедінер, аалчы көреечі полинар.

¹⁴Сірерні сўрчеткен кізілерні алғанар. Харғабаңар, че алғапчадынар. ¹⁵Өрінчеткеннернең хада өрінінер. Ылғапчатханнарнаң хада ылғанар. ¹⁶Удур-төдір пір тиң сағыссыразынар. Улуғсырхабаңар, пазымнығларның чолынча пазынар. Постарынңанар ла сағынманар.

¹⁷Чабалға чабалнаң нандырбаңар. Прай кізілернің аразында чахсы идерге кўстенінер. ¹⁸Ондайларың пар полза, прай кізілернең амыр чуртирға кўстенінер. ¹⁹Хынғаннарым, постарынның үчўн өс албаңар. Худайның өкпеленізі анзын итсін. Пазылых нооза: Мин өс аларбын, Мин төлирбін, – тіпче Хан Худай. ²⁰Ол ондайнан, ыырчың астапчатхан полза, азырап сал аны, сухсапчатхан полза, суғар сал аны: іди идіп, син аның пазына кўйчеткен көстерні чыып пирерзің. ²¹Чабалға пастыртпа, чабалны чахсынаң чиңіп алчат.

Ұлғу холында чөрердеңер

13 Ноо даа кізі позын өөркі ұлғүлерге пазындыртча. Худайдаң пирилген ұлғүдең пасха ұлғү чоғыл нооза. Нинче пар прай ұлғүні Худай турғыс салған. ²Аннаңар ұлгее тоғырланчатхан кізі Худай турғысхан нимее тоғырланча. Тоғырланчатхан кізі, тізең, позы позын чарғаа тартча. ³Чахсы киректер нимес, хомай киректер итчеткен кізілер устағчылардаң хорыхчалар. Ұлғүдең хорыхпасха хынчазың ма? Чахсы ниме ит, ұлгее махтадарзың. ⁴Пастых, Худайның нымысчызы полип, сағаа чахсы идерге турғызылған. Чабал ниме итчетсең, хорых, ол хылысты тик чирдең ал чөрбинче. Ол, Худайның нымысчызы полип, чабал ниме итчеткен кізілерні хатығлап, Худайның өкпеленізің читірче. ⁵Аннаңар, Худайның өкпеленгенінең хорыхчатханнаңар

нимес, че ах сағыстыҥ кизілер полып, пастыхтың чооҕын истерге кирексер.

⁶Аннаңар сірер албан-чаға төлепчезер. Устаҕчылар, Худайның нымысчылары полып, постарының тоҕыстарын сыбыра толдырчалар нооза. ⁷Полған на кизее аҕаа пирчеен пир салчадынар: хайзына албанны, хайзына албан-чаҕаны; хайзыларынаң хорыҕыңар, хайзын улуҕлаңар.

Хыныс Чахыҕны толдырғаны полча

⁸Удур-төдір хынысханнаң пасха паза пірдеезіне пір дее пасха алым чох ползын. Пасха кизее хынчатхан кизі чахыҕны толдыр салған нооза. ⁹«Оралыс чөрбе», «өдірбе», «оҕырлаба», «чой киречілебе», «пасха кизінин хараспа» теені паза пасха даа чахыҕлар пір ле нимені таныхтапчалар: «чағыныңа поэыңа чіли хын». ¹⁰Чағыныңа хынчатсан, аҕаа чабал ниме итпессің. Аннаңар кизее хынғаны чахыҕны толдырғаны полча.

¹¹Иди чуртаңар. Амҕы тусты пілчезер нооза: усхунар тус чит килді. Піс киртініп пастаан тустың хыринда пүүн пістің арачыланызыбыс улам тың чағыннап килді. ¹²Хараазы ирт парды, күнөрткізі чаҕдап килді. Че, харасхының киректерін суур тастабызыңар, чарыхтың тиріглерін поэыбысха кизіп алааңар. ¹³Күн чариинда чіли иптiг чуртаалар: күлет саппин, араға іспин, хычыха, сайбахха салынмин, тартыспин, істі чохтаныспин. ¹⁴Хан-пигібіс Иисус Христос Поэы сірерге хуйах ползын. Иді-ханыңардаңар сағыссырасты хычыхтаныстарға айландырбаңар.

Харындазыңны чарғылаба

14 Киртіністе пик нимес кизілерні постарына хозыңар. Че оларның сағыстары хоостыра таласпаңар. ²Піреезі, прай нимені чирге чарир тіп, киртінче. Киртін полбинчатханы, тізең, чир-тамаан на чіпче. ³Прай ниме чіпчеткен кизі чібинчеткенні нимее салбин полбазын. Чібинчеткені, тізең, прай ниме чіпчеткен кизіні хомайлабазын: Худай аны Поэына алған нооза. ⁴Пасха кизінің хулын хомайлирға кем пол партырзың син? Поэының Хан-пигі алнында ол, турза, турар, аңдарылза, аңдарылар. Че көдіріл парар. Худай аны көдір полар.

⁵Пірее кизі ноо-да күннi пасхазынаң улуға санапча. Пасха кизі, тізең, прай күннер пір тиңнер тіп санапча. Полғаны ла поэының сағызы хоостыра итсін. ⁶Күннернiң улиин-кічиин

талластырчатхан кізі анзын Хан-пигні улуғлап итче. Прай күн-нер пір тиң тіп санапчатхан кізі дее анзын Хан-пигеок итче. Чіпчеткен кізі Хан-пигні улуғлап чіпче, Худайны алғыстапча. Чібинчеткені дее Хан-пигні улуғлап чібинче паза Худайны алғыстапча. ⁷Пірдеезі посха чуртабинча, посха өлбинче нооза. ⁸Піс чуртапчатхан ползабыс, Хан-пиге чуртапчабыс, өл парчатсабыс, Хан-пиге өл парчабыс. Ол ондайнаң чуртапчатсабыс таа, өл парчатсабыс таа, піс Хан-пигнибіс. ⁹Христос өліглернің паза тіріглернің Хан-пигі поларға тіп өлген паза тірілген нооза.

¹⁰Син, тізең, ноға харындазыңны хомайлапчазың? Алай ноға харындазыңны нимее салбинчазың? Піс прайзыбыс Христостың чарғызында турарбыс нооза. ¹¹Пазылых: Мин чуртапчам, тіпче Хан Худай, Минің алнымда ноо даа тізек ээлер, ноо даа тіл Худайны саблир. ¹²Ол ондайнаң полғаныбыс ла Худайның алнында нандырығ тударбыс.

Харындазыңны харылдырба

¹³Аннаңар удур-төдір хомайласпанар. Улам харындастың чо-лына харылчаң ниме салбастанар, аны сүрнүктірбестеңер сағы-ныңар. ¹⁴Мин пілчем, пір дее ниме пос поэы кірліг полбинча нооза. Хан-пигібіс Иисус мині анзына киртіндір салған. Піреезі ноо-да нимені арығ нимеске санапчатса, ол ағаа арығ нимес. ¹⁵Синің чіпчеткен чиизіне харындазыңның көңні ардапчатса, син хыныс хоостыра итпинчезің. Чиистің үчүн харындазыңны чох итпе. Христос ол кізінің үчүн өл парған. ¹⁶Сіреер чахсаа санапчатхан ниме хомайлалбазын. ¹⁷Худайның хан-үлгүзі^c ас-суғ нимес нооза. Че ол ах сағыс, амыр чуртас паза Худай Худынаң пирилген өрініс. ¹⁸Иди чуртапчатхан Христостың нымысчызын Худай көңніне кирче, ол чонға махтатча.

¹⁹Ол ондайнаң амыр чуртирыбыс үчүн прай ниме идееңер паза удур-төдір улызызарға харазаңар. ²⁰Чиистің үчүн Худайның киректерін сайбаба. Прай ниме арығ. Че ікі сағыстанып чіпчеткен кізее хомай. ²¹Ит чібеені, араға іспеені паза харындазыңны харылдырчатхан, алай изі чоxtандырчатхан, алай чазығ итчеткен нимені итпеені артых полар. ²²Синің киртінізің пар ба? Худайның алнында ол поэыңда пар ползын. Сынында орта тіп санапчатхан нименің үчүн поэын пыролабинчатхан кізі часкалығ. ²³Ікінчїлеп ала чіпчетсе, киртініс хоостыра итпинчеткені-неңер, аны Худай чарғылапча. Киртініс хоостыра идїлбинчеткен

ноо даа ниме чазых полча. ²⁴Худайға сабланыс ползын! Мин сірерге чарлаан Чахсы Хабарның пастыра Ол киртіністерінні пик ит салар. Пу Иисус Христостанар үгредіг. Аны піске Худай ас пирген. Ол чүзерлеп чыллар азылбаан чазыт полған. ²⁵Амды, тізең, ухаанчыларның пічіктерінде пу чазыт азыл парған. Прай чоннар, Худайға киртініп, Аның холына кірерлері үчүн, Мөгі Худай Чахсы Хабарны оларға чарлирға чахаан. ²⁶Чалғыс паза Хыйға Худайыбысха Иисус Христостың пастыра хақанға даа сабланыс ползын.

Христостың оңдайынча полааңар

15 Піс, күстіглер, пос көннине полбин, чазығ кізілернің аарсаанын артынарға кирекпіс. ²Полғаныбыс ла чағыныбыстың көннине поларға кирекпіс. Киртіністерің пик полар үчүн, ағаа чахсы идерге кирекпіс. ³Христос таа поэның көннине чөпсіндірбеен. Пазылых нооза: Сині сөклепчеткеннернің сөккестері мағаа түстілер. ⁴Алында пазылған ниме пісті үгреде пазылған. Худай Пічии пирчеткен тыстаныс паза часхарыс пастыра ізеніс аларыбыс үчүн пазылған анзы. ⁵Тыстаныс паза часхарыс пирчеткен Худай, тізең, сірерге Христос Иисустың оңдайынча пір сағыстығ поларын пирзін. ⁶Анзы сірер прайларың пір үнге Худайны паза Хан-пигібіс Иисус Христостың Пабазын саблирларың үчүн ползын. ⁷Худайның сабланызын аларларыңның үчүн, Христос сірерні Позына хосхан. Аннаңар сірер дее удур-төдір ідөк чағынназыңар.

⁸Мин мына ниме чоохтапчам. Иисус Христос сүннет итірткеннерге нымысчы улыбысхан. Ол анзын Худайның сынын көзідерге тіп паза өбекелерге пирген молчағның толары үчүн иткен. ⁹Ол ідөк пасха чоннарға нымысчы улыбысхан. Ол, Худай өлчей пиргенненер, чоннар Худайны сабландырзыннар тіп, анзын иткен. Піди пазылых: Мының үчүн Сині пасха чоннарның аразында саблирбын паза Синің адың арнап ырлирбын. ¹⁰Ағаа хоза піди пазылых: Худайы чох кізілер Аның чоңынаң хада өрінзіннер. ¹¹Паза хоза: прай чоннар, Хан Худайны махтаңар, прай төллер, Аны сабаңар! ¹²Ағаа хоза Исайи тіпче: чоннарнаң устир үчүн Иессейнің тамыры, өтіп, көдіріл килер. Ағаа Худайы чох кізілер ізенерлер. ¹³Ізеніс пирчеткен Худай, тізең, сірерні киртіністеріңнің пастыра пар-чох өрініснең паза амырнаң толдыр салзын. Худай Худының күзінең ізеністерің көптеліп одырзын.

Павел илчiнiң тоғызы

¹⁴Харындастарым! Мин сiрернiң чахсы нименен тол парған-нарынны, сiрерде ноо даа пiлiс парын паза удур-тiдiр үгредiс полчатханнарынны пiр дее iкiнчiлебинчем. ¹⁵Мин аны сiрерге, харындастар, сағысха кирзiннер ле тiп, кiмес пас салғам. Мин анзын Худайдаң пирiлген паарсас хоостыра тiдiмнiг пасхам. ¹⁶Мағаа Худайы чохтарның аразында Христос Иисустың нымысчызы поларға Худайның паарсазы пирiлген полған. Абыс^с тоғызын толдырып, мин Чахсы Хабарны чарлапчам. Мин анзын, Худай Худы чарыт салған чоннар Худайға чарас толығ ползыннар тiп иткем. ¹⁷Аннаңар мин Худайға Христос Иисустың пастыра иткен киректерiмнен махтан поларбын. ¹⁸Христос минiң пастыра иткен нимеденер ле тiдiмнiг чоохтап поларбын. Ол пасха чоннарны сiстiң паза киректiң пастыра Худайның чооғын истерiне ағылған. ¹⁹Ол анзын танығларнаң паза хайхастарнаң^с, Худай Худының күзiнен иткен. Аннаңар мин Христостың Чахсы Хабарына Иерусалимнен Иллирикке читкенче үгрет парғам. ²⁰Мин Христостың ады чарлалбаан чирде Чахсы Хабарға үгредерiн орта кирекке санаам. Пасха кiзi салған тiстегде пүдiрерге хынмаам. ²¹Пiди пазылған: Аннаңар хабар албаан кiзiлер кiрерлер, испеен кiзiлер оңнирлар.

Павел Римзер парарға пiгiнче

²²Мин сiрерзер килерге иткем, че пу киректерiмнiң үчүн кiп хати тудыл парчатхам. ²³Амды пу хан-чирлерде мин Христостанар чарлабаан орын халбады. Мин, тiзең, иледе чыллар сiрерге чидерге сағынғам. ²⁴Испан чирiнзер чол сыхсам, сiрерзер чидерге тiп сағынған полғам. Андар парирып, сiрернен кiрiзiп, чоохтазып алғаныма кiннiмнi кiмес тее тосхырған соонда, сiрер мағаа чолымны аннаң андар узарадарға полыс пирерзер тiп iзенчем. ²⁵Сағам, тiзең, Иерусалимзер ах-арығларның нымызына чiрерге парирбын. ²⁶Македон паза Ахай чирлерiндегi Худай кiзiлерi Иерусалимдегi ах-арығларның чох чуртапчатханнарына полызығ пирерге кiннiлерiн читiргеннер. ²⁷Олар анзын пос кiннiнен иткеннер. Итсе, идерге кирек полғаннар. Ол чон иудейлернен хада Худай Худының пайында араласханнарында, оларға постарының ис-сибiнен үлес пирерге кирегiктер. ²⁸Ол ондайнаң, мин пу тоғызымны идiбiсsem, паза оларға чыып пирген

нимені холға прай кирип алғаннарын пос хараамнаң көрип алзам, Испан чирінзер сығыбызып, сирерзер чолами кирербін. ²⁹ Мин сирерзер килзем, Христостың Чахсы Хабарның алғазын толдыра синінең ағыларымны пілчем нооза.

³⁰ Харындастар! Хан-пигібіс Иисус Христостың паза Худай Худының хынызы үчүн алданчам, минің күрезииме хозылыңар. Минненер Худайға пазырыңар: ³¹ Мині Иудей чирінде^с киртін-минчеткеннердең озып алзын паза Иерусалимде ах-арыңларның нымызына чөргенім килістіре ползын тіп, пазырыңар. ³² Худайның көннi хоостыра минің сирерзер өрініп ала килерім паза сирернең хада тынанып аларым үчүн пазырыңар. ³³ Амырны пирчеткен Худай, тізең, сирернең прайзыңарнаң хада ползын. Аминь.

Алғыстастар

16 Фива пичебіснең, Кенхрей саардағы тигірибнің^с польсычызынаң, сирерні таныстырчам. ² Аны ах-арыңларға турыстыра удурланар. Анзын Хан-пиге идіңер. Сирерде пірее ниме кирексінчетсе, хабас пиріңер. Ол даа көп кізее, мағаа поэыма даа хабасчаң нооза.

³ Прискилланаң Акилаа изен читіріңер. Олар Христос Иисустың үчүн миннең хада тоғынғаннар. ⁴ Олар, минің тынымны ал халар үчүн, чуртастарына даа айабааннар. Оларға мин не нимес, пасха чоннарның прай тигіриблері алғыс читірчелер. ⁵ Оларның ибдегі тигірибіне идөк изен читіріңер. Минің хынған Епенедіме, Ахай чирінде Христосха пурун киртін сыххан кізіме, изен читіріңер. ⁶ Піске көп тоғынған Мариамға изен читір пиріңер. ⁷ Миннең хада харибде одырған туғаннарыма Андроникнең Юнийге изен читір пиріңер. Олар Христосха миннең пурун киртін парғаннар. Илчілернің аразында оларны улуғлапчалар.

⁸ Хан-пигні үчүн мин тың хын парған Амплийге изен читіріңер. ⁹ Христосха піснең хада тоғынчатхан Урбанға паза минің аарлығ Стахийіме изен читіріңер. ¹⁰ Христостың сын кізізі Апеллеске, Аристовулның прай ибдегілеріне изен читіріңер ¹¹ Минің туғаныма Иродионға изен читірчем. Наркисстің ибіндегі Хан-пигнің чоңына изен ползын.

¹² Трифенге паза Трифосха, Хан-пиге прай күстерін салып, тоғынчатхан ипчілерге изен. Хан-пиге матап тоғынчатхан хынғаныма, Персидаа, изен читіріңерөк. ¹³ Худай таллаан Руфха паза мағаа даа іче полған аның ічезіне изен ысчам. ¹⁴ Асинкритке,

Флегонтха, Ермийге, Патровха, Ермаға паза оларнаң хада полчатхан харындастарына изен ысчам. ¹⁵Филологха, Юлийе, Нирейге паза аның пичезіне изен, Олимпанға паза аннаң хада полчатхан прай ах-арығларға изен. ¹⁶Удур-төдір, ах-арығ хынызып, изеннесчедінер. Прай тигіриблер сіерге изен читірчелер.

¹⁷Харындастар! Тигіриблерні чарчатхан паза сіер үгринген үгрөдігден чара тартчатхан кізілерден китенінер, олардаң хыйа улыңар тіп алданчам. ¹⁸Андағ кізілер, Хан-пигібіс Иисус Христостың нимес, хурсахтарының нымызында чөрчелер. Олар киртінчек кізілерні ирке, чойырхос сөстернең алаахтыр салчалар. ¹⁹Сіернің чоох исчеткеннеріңні прайзы пілче. Мин сіернің үчүн өрінчем. Сіерні, чახсы кирекке хыйға, чабал ниме итпес ах-арығ ползыннар тіп сағынчам. ²⁰Андада амырны пирчеткен Худай түрче поларынаң сайтанның^c, сіернің азаңар алтына тастап, чох ит салар. Хан-пигібіс Иисус Христостың паарсазы сіернең хада ползын.

²¹Сіерге миннең хада тоғынчатханым Тимофей, ідөк Луцийнең Иасон паза Сосипатр туғаннарым изен читірчелер. ²²Мин паза пу пічікті пасчатхан Тертий, сіерге ідөк Хан-пигде изен читірчебіс. ²³Мағаа паза прай тигірибге ибінде орын пирген Гаий ідөк сіерге изен читірче. Ераст, саарның ахчазын тутчатхан кізі, паза Кварт харындас изен читірчелер.

²⁴Сіерге прайзыңарға Хан-пигібіс Иисус Христостың паарсазы читсін. Аминь.